

# Akhbar bantu pacu bidang akademik, TVET

Berita Harian  
Khamis, 15 Jun 2017

**Sungguh** teruja dan berbangga membaca tajuk berita, 'BH Iktiraf sekolah cemerlang' di akhbar ini pada 31 Mei lalu. Anugerah yang julung kalinya diperkenalkan dalam Majlis Anugerah Pelajar Cemerlang (APCBH) 2016 kepada sekolah yang komited memacu kegemilangan sekolah masing-masing.

Selain itu, BH turut perkenal anugerah Rakan Sekolah Cemerlang Sukan, Rakan Sekolah Cemerlang Akademik, Rakan Sekolah Cemerlang Kokurikulum dan Pendidik Kreatif Usaha BH mengangkat bidang akademik ke peringkat berprestij seperti Anugerah Bintang Popular BH sangat terpuji dan disanjung tinggi.

Menjadikan akhbar sebagai alat bahan bantu mengajar (ABBM) dalam Pembelajaran dan Pemudahcaraan (PdPc) terbukti membantu meningkatkan kefahaman pelajar. Pengalaman ketika bertugas di sekolah menengah sebagai guru Bahasa Melayu dan menggunakan sisipan BH dalam kelas telah membolehkan pelajar yang lemah menguasai subjek itu.

Pelajar boleh mengaplikasi, membanding, menganalisis dan mensintesis ilmu yang diajar guru dengan artikel, gambar, panduan, soalan latihan dan contoh jawapan yang disediakan menerusi sisipan seperti *Didik*, *Minda* dan *Skor*. Menurut pemenang da-

lam kalangan guru dan pelajar, sisipan dan Seminar SPM BH Skor melatih pelajar menjawab soalan kemahiran aras tinggi (KBAT).

Sehubungan itu, BH berpotensi memacu dan memperkasakan bidang akademik dan Pendidikan dan Latihan Teknik dan Vokasional (TVET) di negara ini.

Sama ada pelajar ataupun guru mereka mesti boleh menggunakan minda dan fizikal secara serentak semasa menggunakan sisipan BH dalam PdPc. Contohnya, dalam penghasilan peta minda berkaitan sesuatu topik, pelajar perlu menganalisis dan mencerakan isi-isi yang berkaitan daripada sisipan yang digunakan. Kemudian, pelajar perlu menggunakan kemahiran psikomotor seperti mengunting dan menampal untuk menghasilkan peta minda yang menarik dibaca.

## Syor Perkenal Rakan Institusi Pengajian Tinggi

Selain sisipan *Didik*, *Minda* dan *Skor* yang sememangnya signifikan dibawa masuk ke dalam kelas di sekolah-sekolah, ruangan lain boleh di bawa masuk ke bilik kuliah oleh pensyarah bidang TVET di sekolah dan institusi pengajian tinggi. Justeru, disarankan *BH* juga memperkenalkan Anugerah Rakan Institusi Pengajian Tinggi cemerlang dalam kalangan pensyarah dan pelajar.

Bagi pensyarah yang mengajar bidang hospitaliti, fesyen dan pakaian, katering/kulinari dan kecantikan boleh menggunakan ruangan *Aura* sebagai bahan rujukan utama mahupun sebagai ABBM dalam proses PdPc.

BH juga menyediakan ruangan Keusahawanan dan Bisnes. Ruangan itu sangat relevan digunakan oleh pensyarah dan pelajar program dan kursus perakaman, kewangan, ekonomi, perniagaan, pelancongan dan pelaburan. Oleh itu, jelas menunjukkan bahawa BH dapat membantu memacu lonjakan bidang TVET di negara ini.

Dalam konteks kemanusiaan, pelajar bidang TVET juga perlu mempelajari kursus seperti Keagamaan, Tamadun Islam dan Tamadun Asia. Oleh itu ruang seperti Dunia, Agama dan Isu sangat sesuai dijadikan rujukan.

Cabarannya, pelajar hari ini kurang berminat membaca terma- suklah akhbar, maka peranan pensyarahlah untuk mencuba pendekatan menggunakan akhbar di dalam bilik kuliah. Kalau tidak dipecahkan ruyung mana- kan dapat sagunya.

**Prof Dr Ahmad Esa,**  
Dekan Fakulti Pendidikan,  
Teknikal dan Vokasional,  
Universiti Tun Hussein Onn  
Malaysia



Guru yang menggunakan akhbar dalam PdPc membantu meningkatkan kefahaman pelajar.